



Број: **01/2-05-1-182/18**

Сарајево, 20. 2. 2018.

ZABILJEŠKA

sa sastanka Komisije za vanjske poslove Predstavničkog doma PSBiH s delegacijom Odbora za vanjsku politiku Hrvatskog sabora

Druga zamjenica predsjedavajuće Komisije za vanjske poslove Predstavničkog doma Parlamentarne skupštine BiH Nermina Kapetanović i članovi Mirsad Đonlagić, Senad Šepić i Sadik Ahmetović razgovarali su 19. 2. 2018. u Sarajevu s članovima delegacije Odbora za vanjsku politiku Hrvatskog sabora, koju je predvodio predsjednik tog odbora Miro Kovač.

U delegaciji su bili i Davor Ivo Stier i Arsen Bauk, a sastanku dvije parlamentarne delegacije prisustvovali su i ambasador Republike Hrvatske Ivan Del Vecchio sa saradnicima iz Ambasade, te sekretarke Komisije i Odbora Merdžana Iglica i Martina Kušljačić.

Tokom otvorenog i srdačnog razgovora, gosti iz Hrvatske naglasili su da je posjeta Odbora za vanjsku politiku Hrvatskog sabora, ostvarena na poziv Komisije za vanjske poslove Predstavničkog doma PSBiH, potvrda dobrosusjedskih odnosa dviju zemlje, kao i spremnosti Hrvatske da nastavi podržavati evropski put Bosne i Hercegovine.

Članovi delegacije Odbora za vanjsku politiku Hrvatskog sabora iznijeli su stav da BiH, kao država, tijesno ekonomski i infrastrukturno povezana s Hrvatskom i kao država u kojoj Hrvati imaju status konstitutivnog naroda, predstavlja najvažnijeg susjeda Hrvatske. Oni su izrazili želju da se BiH nastavi razvijati u pravcu funkcionalne i pravne države, što je, kako su kazali, jedan od najvažnijih uslova za ulazak BiH u Evropsku uniju. S tim u vezi posebno je akcentirano pitanje izmjene Izbornog zakona BiH u skladu s presudom Ustavnog suda BiH, te upozoreno da bi eventualna politička kriza, koja bi mogla izbiti nerješavanjem ovog pitanja, mogla uticati na proces provođenja ekonomskih i socijalnih reformi u BiH.

Ističući kako cijene podršku koju Hrvatska pruža procesu evropskih integracija BiH, članovi Komisije za vanjske poslove Predstavničkog doma naglasili su da o svim otvorenim pitanjima treba razgovarati u okviru institucija i u duhu dobrosusjedskih odnosa. S tim u vezi spomenuta su pitanja međudržavne granice, posebno granice na moru i izgradnje Pelješkog mosta, kao i pitanja odlaganja nuklearnog otpada na području koje graniči s BiH, odnosno problema tzv. Gornjeg toka, te pitanje bosanskohercegovačke imovine u Hrvatskoj.

Hrvatska strana također je zamoljena da učini dodatni napor kako bi se rasteretili granični prijelazi, posebno za osobe koje svakodnevno prelaze granicu s Hrvatskom, što bi, kako je naglašeno, poslalo pozitivnu sliku građanima i dodatno relaksiralo odnose dviju države.

Na sastanku dvije delegacije iznesena je ideja i o potrebi održavanja regionalnih sastanaka predstavnika parlamentarnih komisija/odbora za vanjske poslove.

Dobra atmosfera sa sastanka dvije delegacije prenesena je i na radni ručak tokom kojeg se detaljnije razgovaralo o nekim pitanjima otvorenim na sastanku. Posebno je naglašena potreba češćih susreta i suočavanja s pitanjima koja su u domenu dvije komisije/odbora i u interesu dviju država.

Članovi delegacije Odbora za vanjsku politiku Hrvatskog sabora pozvali su članove Komisije za vanjske poslove Predstavničkog doma PSBiH u uzvratnu posjetu Hrvatskom saboru.

SEKERTARKA KOMISIJE
Merđžana Iglica